

24. april 2017

**Uunga siunnersuut: Inuit Innarluutillit illersuisuat pillugu Inatsisartut inatsisaat nr. xx, xxxxx 2017-imeersoq**

Naalakkersuit saqqummiussaannut Innarluutillit illersuisoqalernissaannut tunngatillugu Siumumiit nuannaarluta imak saqqummiussissaagut.

Innarluutillit oqaaseqarsinnaanngitsut imaanngilaq oqarusunngisaannartut, innarluutillit tusaasinnaanngitsut tassaanngillat tusaarusunngitsut, innarluutillit isigisinnaanngitsut imaanngilaq takorusunngitsut, innarluutillit tassaapput uatsitut oqariartuuteqarusuttut, minnerunngitsumik uatsitut misigissuseqartut. Innarluutillillu innarluutaasa ilai isinit takuneqarsinnaanngillat paasinerlunneqartarlutillu taakku. Innarluutillit tassaapput minguingaartumik uummatillit taakkulu illersussallugit uagut pisussaaffigaarput.

Siumut pingaartilluinnarpaa sutigut tamatigut innarluuteqartut immikkoortinnagit inuiaqatigiinnut akuutinneqarnissaat, immikkullu pisariaqartitsinerat aallaavigalugu tapersorsorneqarnissaat taamattuarlu najugaqarfissaat, ilinniarfissaat pisariaqartitsinerat aallaavigalugit ikiorserneqartarnissaat.

Innarluutillit illersuisoqalernissaat pitsaasumik isumalluarfigaarput. Nuannaarpugut ukiorpassuarni ilaqutariit saaffissatut amigaatigisartagaat maanna siunnersuut una akuersissutigineqarpat kiisami piviusunngoraluttualermat. Innarluutillit atugaat nunatsinni isorartoqisumi imaannanngissinnaasaqaat, annikilliornerpassuit, kiserliornerpassuit, paasineqarusukkaluarlutik saaffissaaruttarneit nunatta inuisa ukiuni amerlaqisuni inooqataaffigisariaqarsimavaat, tamakku pillugit Innarluutillit illersuisussaata tassaasariaqarpoq suliassamut annertuumut unamminartumullu ilivittumik uummateqartoq, sorsuutiginnissinnaasoq anguniakkaminillu avaqqutaarinani pimoorussisinnaasoq.

Qassiillimi angajoqqaat ilaqutaasullu qulliit nakkaasut isigigaluarpagut allartersinnaanagilli, qassiillimi angajoqqaat meeqqaminni avissaartariaqartut tusartaraluarpagut annertunerusumilli illersorsinnaasarnatigit, qassiillimi ilaqutaasut tulaassivissaarullutik saaffissaaruttarpat atukkat artornartut kipiluttunartullu aaqqiivigerusukkaluarlugit. Tamakkorpasuupput allarpasuullumi eqqaasinnaagaluarpagut, maanna neriutissaqalersitavut, Siumumiillu uummammik pisumik qutsallugillu kissaarpagut Innarluutillit illersuisuannit tapersorsorluarneqarlutillu aqutissiulluarneqarumaarnissaannik.

Uagut politikikkut sinaakkutit maani inatsisiliornitsigut pilersittussaavagut, taamaattumik ilanngullugu eqqumaffigisariaqarparput Innarluutillit Illersuisuat pillugu suliat maanna aallartittussat sapanginnaveersaartuarnissaat. Inatsisissaq una pilersinneqaqqullugu qaqitsisoq Vivian Motzfeldt Siumumiit qutsavigaarput.

Taamaattumik siunnersuut aappassaaneerlugu oqaluserineqannginnerani Peqqissutsimut Ilaqutariinnullu Ataatsimiittaliamat peqqissaarullugu suliarineqarnissaa innersuupparput. Naalakkersuisullu qutsavigaagut suliamut piviusunngortitseqataanissaminut piomassuseqarmata.

Laura Táunajik  
Siumut

